

Meeqqat atuarfiini atuartunut angerlarsimaffiit atuartunullu inissiat pitsaassusissaasa minnerpaaffilerneqarnissaat siunertaralugu Naalakkersuisut suliniuteqaqqullugit Inat-sisartut aalajangiiffisassaattut siunnersuut
Inatsisartunut ilaasortamit Jane Petersenimit
saqqummiunneqartoq

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap

ISUMALIUTISSIISUTAA

Siunnersuutip aappassaaneerpeqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Andreas Uldum, Demokraatit, siulittaasuugallartoq

Juliane Henningsen, Inuit Ataqatigiit

Ruth Heilmann, Siumut

Doris Jakobsen, Siumut

Jane Petersen, Inuit Ataqatigiit, Harald Biancomut, Inuit Ataqatigiit, sinniisoq

UKA 2010-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaanni siammasissumik najugaqariaatsip kinguneraa nunaqarfinni atuartut angajullit atuarnertik naammassiniarlugu illoqarfinni nunaqarfinniluunniit anginerusuni atuartut angerlarsimaffiit nuuttariaqartarnerat. Atuartut angerlarsimaffii taakku naammaginatsumik pitsaassuseqaqqullugit siunnersuuteqartoq isumaqarpoq. Taamaattumik atuartut angerlarsimaffiisa aqqissugaanerannut pituttuisuusumik minnerpaaffiliinissaq Naalakkersuisunit sulissutineqassasoq siunnersuuteqartup kissaatigaa. Minnerpaaffiliinissaq taanna pillugu siunnersuuteqartoq ersarinnerusumik nassuiaateqaqqullugit. Taamaattorli atuartut angerlarsimaffiisa aqqissuunneqartarnerat pillugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik ilitsersuummik suliaqarsimasoq pillugu nalilersueqittoqarnissaanik siunnersuuteqartoq kissaatigaa.

Inatsisartut siunnersuummik siullermeerinninnerat

Siunnersuummi siunertarineqartut siullermeerinninnermi partiinit tamanit taperserreqarput tassa arlaqartunit tikkuarneqarmat atuartut angerlarsimaffiisa pitsaannginnerat Atuarfitsialaap naatsorsuutigineqartutut iluaqutissartaanut apparsaataasinnaammat. Tamatuma saniatigut allaneqarpoq siunnersuutip aningaasaqarnikkut kinguneqaatissai Naalakkersuisut akissuteqaataanni tamakkiisumik ersersinneqarsimanngitsut.

Ataatsimiinnerit

Ataatsimiititaliap siunnersuummik suliarinninnerminut atatillugu kommunit siunnersuummut isumaat qulaajarniarlugu KANUKOKA ataatsimeeqatigaa. Ataatsimiititaliap ataatsimeeqatiginissaanut KANUKOKA piffissaqarsimammat manna iluatsillugu ataatsimiititaliap qutsavigerusuppaa.

Atuartut angerlarsimaffiisa aaqqissugaanerannut pituttuisuusumik minnerpaaffiliinissamik suliaqarnissaq pillugu kommunit Namminersorlutik Oqartussanik oqaloqateqarnissaminnut piareersimasut ataatsimiinnermi KANUKOKA-mit oqaatigineqarpoq. Aammattaaq atuartut angerlarsimaffiini perorsaaniikkut siunertat aallunneqarnerunissaat kattuffiup kissaatigigaa KANUKOKA-p oqaatigaa, taamaalilluni atuartut angerlarsimaffii najugaqarfiinnaaginnaratik angerlarsimaffivittut iluseqarnerulersinnaaqullugit. Aamma nunaqarfimmit illoqarfimmut nuunnerup atuartunut sapinngisamik toqqisisimanarnerpaajunissaa pingaaruteqarmat KANUKOKA-p ataatsimiititaliaq isumaqatigaa.

Kiisalu atuartut angerlarsimaffiini aaqqissuinnermi iluserititassatut ilitsersuut Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit suliarineqartoq KANUKOKA-mit ilisimaneqanngitsoq ataatsimiinnermi paasineqarpoq. Ataatsimiititaliamit tamanna tupaallaatigineqarpoq, tassami ilitsersuut kommuninit nalinginnaasumik ilisimaneqarlunilu taakku suleqatigalugit suliarineqarsimasoq ataatsimiititaliaq isumaqarmat. Taamaalilluni ilitsersuut ilaatigut kommunit ilaannik suleqateqarnikkut suliarineqarsimasoq kiisalu ilitsersuut kommuninut tamanut nassiunneqarsimasoq siunnersuutip siullermeerneqarneranut Naalakkersuisut akissuteqaataanni allassimavoq. Iluserititassatut ilitsersuut pillugu KANUKOKA-mit oqaatigineqartoq ataatsimiititaliamit tusaatissatut tigueqarpoq.

Ataatsimiititaliap isumaliutersuutai

Nunarput tamakkerlugu illoqarfinni arlalissuarni atuartut angerlarsimaffii ullutsinnut naaper-tuukkunnaarlutillu naleqqukkunnaarsimasut ukiuni arlaqalersuni ilisimaneqarpoq. Ilaatigut

Upernavimmi, Nuummi, Tasiilami kiisalu Nanortalimmi atuartut angerlarsimaffii ullutsinnut naleqqukkunnaartut ukiuni kingullerni 6-8-ini erseqqissaatigineqartarpoq.

Atuartut nunaqarfinneersut taamaalillutik pitsaasumik najugaqarsinnaaqqullugit atuartut angerlarsimaffiisa aalajangersimasumik pitsaassuseqarnissaannik Inatsisartut siunnersuuteqartullu oqarnerannut Ataatsimiititaliaq isumaqataavoq. Ineqarnermi pissutsit pitsaanngitsut ullutsinnullu naleqqutinngitsut atuartut nunaqarfinneersut pitsaannginnerusumik atuarnernik kinguneqarsinnaavoq. Ineqarnikkut pissutsit pitsaasut atuarneq pitsaasoq pissarsiffiulluortorlu qulakkeersinnaanngimmassuk Ataatsimiititaliamit tikkuarneqassaaq. Atuartut angerlarsimaffii eqqartorneqartillugit perorsaannermut inunnullu tunngasut aamma eqqarsaatigineqartarnissaat pingaaruteqarpoq. Taamaammat Ataatsimiititaliap Naalakkersuisunut kaammattuutigissavaa atuartunik nunaqarfinneersunik perorsaannikkut inuttullu isumassuinermi pitsaassutsinik assigiiaartunik aamma suliaqaqqullugit. Atuartut angerlarsimaffiisa najugaqarfiinnaannginnerannik kisiannili aamma atuartut nunaqarfimmiut perorsaannikkut siunertaqartumik sullinneqarnissaannik tamanna aallaaveqassaaq. Ataatsimiititaliap inassutigissavaa atuartut nunaqarfinneersut tamarmik ataasiakkaarlutik illoqarfimmi ilaqutariinnut ataatsinut aalajangersimasumik attaveqarnissaat soorlu Qasigianguani Villads Villadsenip Efterskoliani aaqqissuussinermut assingusumik. Aammattaaq nunaqarfimmit illoqarfimmut nuunnerup atuartunut minnerunngitsumillu angajoqqaavinut toqqissisimanartuunissaa Tasiilami illoqarfinnilu allani ilinniar-toqarfinni qanoq qulakkeerneqarsimansoq isumassarsiorfigeqqullugu Naalakkersuisut ataatsimiititaliamit kaammattorneqassapput. Atuartut nunaqarfinneersut taamaalillutik illoqarfimmi inuunermut akuutinneqarnissaat aqut taanna atorlugu qulakkeerneqassaaq.

Atuartunut nunaqarfimmiunut atuartut angerlarsimaffiinut kollegienullu assigiiaanik pitsaassusiliinissamik kommunitunut pisussaaffiliisumik nalunaarummik suliaqarnissap inatsisitigut tunngavissinneqarnissaani atuarfik pillugu peqqussutip allanngortinneqarnissaa pisariaqartoq Ataatsimiititaliamit oqaatigineqassaaq.

Siunnersuutip piviusunngortinneqarnerani aningaasaqarnikkut kingunerisassat siunnersuuteqartumiit nassuiarniarneqarsimanngimmata Ataatsimiititaliamit maluginiarneqarpoq. Atuartut angerlarsimaffiinut kollegienullu minnerpaafiliinissamik malittarisassanik pituttuisunik Nunatta Karsianut aningaasartuuteqannginnerunissamik piumasaqaatitaqartoq Naalakkersuisut ilisimatitsissutigaat. Taamatut piumasaqaateqarneq piviusorsiorlutut oqaatigineqarsinnaanngilaq. Ataatsimiititaliap KANUKOKA-mik ataatsimeeqateqarnerata tamanna uppernarsarpaa, tassami KANUKOKA-p oqarnera malillugu ataatsimoortumik tapiissutit pillugit isumaqatigiinniarnernut atatillugu kommunit aningaasaqarnikkut taarsiivigineqarnissartik piumasarisammasuk.

Siunnersuutip aningaasaqarnikkut kinguneqaatissai tamakkiisumik nalilersorneqarnissaat ajornakusoortuusoq Ataatsimiititaliamit isigineqarpoq. ”Kalaallit Nunaanni Atuarfeqarfik – 2009-2010” naapertorlugu atuartut nunaqarfinneersut 225-it atuartut angerlarsimaffiinut inis-sineqarsimapput, tassa atuarnermik naammassinnissinnaajumallutik najugaqarfigisaminniit aallartariaqartartut atuarfimmi atuartut 15 %-iisa missaanniipput. Illoqarfinni taakkunani 18-ini minnerpaamik atuartunut angerlarsimaffeqarnissaa Ataatsimiititaliamit ilimagineqarpoq atuartut angerlarsimaffiisa amerlassusaat eqqarsaatigalugu.

Soorlu eqqaaneqareersutut atuartut angerlarsimaffii arlaqartut ullutsinnut naleqqukkunnaarlutillu aserfallassimapput. Kommunit atuartunut angerlarsimaffiutaat eqqarsaatigalugit annertungaatsiartumik iluarsartuussinissamut aserfallatsaaliinissamullu kinguaattoortoqarsimasoq taamaalillunilu nutaamik atuartunut angerlarsimaffiornissaq akikinnerusussaassasoq Ataatsimiititaliamit ilimagineqartariaqassaaq. Taamaammat siunnersuutip akuersissutigineqarnerata kingunerissavaa kommunini oqartussanut annertungaatsiartumik aningaasartuuteqarnerunissaq Ataatsimiititaliamit nalilerneqarpoq.

Ataatsimiititaliap siunnersuummik suliaqarneranut atatillugu ataatsimiititaliaq Aningaasaqarnermut Ataatsimiititaliap Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisumut apeqqarissaarneranut peqataasimavoq. Apeqqarissaarnermi ilisimatitsissutigineqarpoq atuartut angerlarsimaffiii eqqarsaatigalugit atuarfik pillugu peqqussummik allanngineq taamaallaat siunissami sanaartornissanut tunngassuteqarumaartoq. Allannginerup atuartut angerlasimaffiinik nutaanik sanaartornermut taamaallaat tunngatinneqarnissaa Ataatsimiititaliamit naammaginangitsutut oqaatigineqassaaq. Soorlu siornatigut oqaatigineqareersutut naluneqanngilaq maannakkut atuartunut angerlarsimaffiusut arlalippas-suit aserfallassimaqaat inunnillu najugarineqarnissaminnut naleqqutinngilluinnarlutik. Taamaattumik atuartut angerlarsimaffii maannakkut atuuttuusut ilanngunneqartariaqartut Ataatsimiititaliaq isumaqarpoq.

Atuartut angerlarsimaffiinut avatangiisitigut perorsaanermillu siunertaqartumik kommunit suliaqarnermut ilanngutsinneqarnissaat Ataatsimiititaliamit pingaartutut isigineqarpoq. Taamaalillutik siunnersuutip aningaasaqarnikkut kinguneqaatissai ilisimaneqalissapput aammalu kommunit Naalakkersuisullu ataatsimoorussamik tapiissutit pillugit isumaqatigiinniarnernanut ilanngunneqarsinnaalissallutik. Tamatumunngalu ilutigitillugu Inatsisartut aalajangernissamut tunngavissaat tamakkiisoq qulakkeerneqassaaq.

Ataatsimiititaliap inassuteqaatai

Siunnersuuteqartup tunngavilersuutaa tunngaviatigut Ataatsimiititaliamit isumaqatigineqar-mat Ataatsimiititaliamit naqissuserneqassaaq. Taamaattorli tamakkiisumik ilisimatinneqarsi-

maneq tunngavigalugu matumani kommuninut Namminersorlutillu Oqartussanut aningaasaqarnikkut kinguneqaatissai ilanngullugit Ataatsimiititaliaq aalajangernissamik kissaateqarpoq. Tamatumunnga peqatigitillugu Ataatsimiititaliap kissaatigaa siunnersuut atuartut angerlarsimaffiisa illutaasa pitsaassusaannut taamaallaat tunngatinneqassanngitsoq aammali atuartut angerlarsimaffiisa perorsaanikkut siunertai ilanngunneqassasut. Aammattaaq atuartut angerlarsimaffiisa aaqqissuunneqartarnerat pillugu ilitersuutip maannakkut atuuttuusup nalilersoq-qittariaqarnera Ataatsimiititaliamit isigineqarpoq. Kiisalu atuartut angerlarsimaffii pillugit inatsimmik allannguinermit atuartut angerlarsimaffii maannakkut pisunut siunissamilu atuutilersussanut tunngassuteqassasoq. Taamaalilluni siunnersuummut inaarutaasumik isummer-nissap kinguartinneqarnissaa pitsaanerusutut Ataatsimiititaliamit isigineqarpoq maannakkut isikkumisut ilusiliup akuersissutigineraniit.


Taamaattumik **allannguutissatut siunnersuut** Ataatsimiititaliamit saqqummiunneqarpoq: **Kalaallit Nunaanni atuarfeqarneq kiisalu atuartut angerlarsimaffii pillugit kingusinnerpaamik 2011-imi ukiaaneranani katersuunneq nallertinnagu Naalakkersuisut nassuiaasioqqullugit Inatsisartut aalajangiiffigisassaattut siunnersuut. Nunatta Karsianut kommuninullu aningaasaqarnikkut kinguneqaatissat nassuiaammi ersersinneqassapput atuartut angerlarsimaffiisa illutaasa pitsaassusaannut minnerpaaffiliinissamik suliaqarnikkut qulaajarneqassapput tamatumalu saniatigut atuartut angerlarsimaffiisa perorsaanikkut siunertai qulaajarneqassallutik.**

Allannguutissatut siunnersuut saqqummiunneqartoq **akuerineqassasoq ataatsimiititaliap isumaqatigiittup inassutigaa.**


Taama oqaaseqarluni isumaliutissiisummilu allassimasutut paasinnilluni siunnersuut ataatsimiititaliap aappassaaniigassanngortippaa.




Andreas Uldum



Jane Petersen



Juliane Henningsen



Ruth Heilmann



Doris Jakobsen